



04. august 2009

UKA 2009/48

Naqqiut

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

Inuussutissarsiornikkut politikkiimi kulturikkut inuussutissarsiuteqarnerup aningaasarsiornikkut ingerlatsinermi sukarsuit sisamaattut inissineqarnissaa pillugu Naalackersuisut suliaqaqqullugit peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasortaqa Aleqa Hammond, Siumut)

Tunngavilersuut:

Nunatsinni aningaasarsiornikkut ingerlatsinermi sukarsuit pingasutut taaneqartarput, tassaasullu aalisarnikkut inuussutissarsiuteqarneq, takornariaqarnikkut inuussutissarsiuteqarneq aammalu aatsitassaqaarnikkut inuussutissarsiuteqarneq. Inuussutissarsiutit taakku pingarnerit tassaapput nunatsinni siuarsarneqaannaratik annertuumik siunnerfeqartumillu ingerlatsiviusut suliffissaqartitsisullu.

Nunatta aningaasaqarnerata patajaattumik inissisimalluarnissaanut tamatta suleqataalluta pisussaafeqarlutalu inerisaassaagut. Kulturili tassaannaangilaq aliikkutaqartitsineq takusasaqartitsinnarnerlu. Kulturi aningaasaqanngitsoq ingerlanneqarsinnaangilaq. Kulturikkut ingerlatsisuisut inuussutissaqaannaratik ingerlataminnit annertuumik aningaasartuuteqarfiusumik nammataqartitsisarpoq aammalu tunniussinnaasamik atorineqarnissaat kissaatigaat uagullu inatsisiliortuusugut pisussaafigaarput inatsisitigut aamma atugassiissutigineqartut pitsaasumik qulakkeernissaat.

Nunatsinni amerlaqisut amerliartuinnartullu kulturikkut assigiinngitsutigut pikkoriffeqarlunartut pigaavut. Isiginnaartitsinikkut, qalipakkiornikkut, atuakkiornikkut, taalliornikkut, eqqumiitsuliornikkut, isiginnaagassiornikkut, kusanartuliornikkut allarpassuartigullu nunatsinni ingerlatsisut amerlaqaat. Imminut pilersorsinnaassuseq inerisarneqarsinnaalluaqaaq naalackersuinikkut suliaqartunit aamma tapersorsorneqaannarani siunnerfigissaartumik aqutissiuussinikkut anguneqarsinnaasoraara.

Nunat siuarsimasut amerlasuut innuttami kulturikkut pikkoriffii ineriartorfiilu naalackersuinikkut ingerlatsinerminni aningaasarsiuutit pingarlunartutut isigaat. Aningaasarsiorfittut aalajaattut aammalu innuttaminnut upperinninnermik nassataqartoq takussutissaavoq kinaassutsimik kiinnerfik ataqqinninnerlu. Isumaqarpunga nunatsinni kulturikkut ingerlatsineq inuussutissarsiutitulli allatuulli pingartinneqarluni inuussutissarsiornermut naalackersuisoqarfimmit akisussaafigineqarnissaa pissusissamisoortoq. Politikikkut anguniakkat ersarissut aningaasaliissutillu siunnerfeqarlutut ingerlanneqarsinnaalissapput aammalu siunissaq ungasinnerusoq kulturikkut anguniagaqarfiulersoq pilersinneqassaaq.

Taama tunngavilersuuteqarlunga naalackersuisut kulturip allatuulli inuussutissarsiutigilersinnaaneranut aamma inerisaavigineqarsinnaalernissaanik ingerlataqaqqullugit suliniuteqarnissaannik peqqusivunga neriutigaaralu inatsisartut inuussutissarsiutip annerusumik pingartinneqarluni inerisaaffigineqarnissaannut peqataajumaartut.